

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine na 5. sjednici Predstavničkog doma, održanoj 14. jula 2011. godine, i na 4. sjednici Doma naroda, održanoj 28. jula 2011. godine, usvojila je

**ZAKON
O IZMJENAMA I DOPUNAMA ZAKONA O
PEČATU INSTITUCIJA BOSNE I HERCEGOVINE**

Član 1.

U Zakonu o pečatu institucija Bosne i Hercegovine ("Službeni glasnik BiH", br. 12/98 i 14/03) član 1. mijenja se i glasi:

"Član 1.

Ovim zakonom uređuje se oblik, sadržaj, izrada, čuvanje i upotreba pečata koje u obavljanju poslova iz svoje nadležnosti koriste: Parlamentarna skupština Bosne i Hercegovine, Predsjedništvo Bosne i Hercegovine, Vijeće ministara Bosne i Hercegovine, ministarstva, samostalne upravne organizacije, upravne organizacije u sastavu ministarstva kada je to zakonom određeno, Ustavni sud Bosne i Hercegovine, Sud Bosne i Hercegovine, Tužilaštvo Bosne i Hercegovine, Visoko sudsko i tužilačko vijeće Bosne i Hercegovine, Pravobranilaštvo Bosne i Hercegovine, Ombudsmen za ljudska prava Bosne i Hercegovine, Centralna banka Bosne i Hercegovine, te druge institucije Bosne i Hercegovine osnovane posebnim zakonom ili kojima je posebnim zakonom povjereno obavljanje poslova uprave, odnosno preduzeća, ustanove i drugi pravni subjekti, kada im je zakonom povjereno vršenje javnih ovlaštenja (u daljnjem tekstu: institucije Bosne i Hercegovine)."

Član 2.

U članu 3. st. 1., 2. i 3. mijenjaju se i glase:

"Pečat institucija Bosne i Hercegovine ima oblik kruga i izrađuje se od gume, metala ili drugog odgovarajućeg materijala i sadrži tekst: Bosna i Hercegovina i naziv institucije Bosne i Hercegovine, na tri službena jezika koja su u upotrebi u Bosni i Hercegovini, napisan latiničnim i ćiriličnim pismom upisanim u koncentričnim krugovima oko grba Bosne i Hercegovine, koji se nalazi u sredini pečata.

Pečat sadrži naziv i sjedište organizacione jedinice institucije Bosne i Hercegovine, u skladu sa zakonom.

Pečat koji upotrebljava diplomatsko ili konzularno predstavništvo Bosne i Hercegovine sadrži naziv i sjedište predstavništva u inozemstvu, ispisan na jeziku i pismu zemlje prijema."

Iza stava 3. dodaju se novi st. 4., 5. i 6. koji glase:

"Ako institucija Bosne i Hercegovine ima veći broj pečata istog prečnika, svaki primjerak pečata mora sadržavati i oznaku rednog broja, koja se upisuje između grba Bosne i Hercegovine i naziva institucije Bosne i Hercegovine.

Pečat se izrađuje u dvije veličine, prečnika 50 i 30 milimetara.

Institucije Bosne i Hercegovine iz člana 1. ovog zakona mogu imati i pečat prečnika 20 milimetara, istog sadržaja, radi ovjere finansijskih i drugih službenih dokumenata, kada upotreba većeg pečata nije pogodna."

Dosadašnji stav 4. postaje stav 7.

Član 3.

Član 6. mijenja se i glasi:

"Član 6.

Ministarstvo pravde Bosne i Hercegovine rješenjem odlučuje o zahtjevu za odobrenje izrade pečata institucija Bosne i Hercegovine u roku tri dana od dana podnošenja urednog zahtjeva, u skladu s odredbama Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

Ministarstvo pravde Bosne i Hercegovine odbit će zahtjev za izradu pečata, ako podnositelj zahtjeva nema pravo na pečat institucija Bosne i Hercegovine i ako se zahtjev odnosi na izradu pečata čiji su oblik, izrada, sadržaj i veličina suprotni odredbama ovog zakona.

Ministarstvo pravde Bosne i Hercegovine vodi evidenciju pečata institucija Bosne i Hercegovine koja sadrži podatke o odobrenju izrade pečata, broju primjeraka pečata, datumu početka upotrebe pečata, uništenim, nestalim i izgubljenim pečatima te otisku pečata.

Rukovodilac institucije odlučuje o izradi, čuvanju, rukovanju i dostavljanju pečata na uništenje.

Pečat institucije Bosne i Hercegovine čuva se i njime se rukuje u službenim prostorijama organa, a izuzetno se može koristiti i izvan službenih prostorija kada treba izvršiti službene radnje izvan tih prostorija. Rukovodilac institucije odlučuje kome će povjeriti čuvanje i upotrebu pečata. Lice kojem je pečat povjeren na čuvanje dužno je pečat čuvati na način kojim se onemogućava njegovo neovlašteno korištenje.

Pečat institucije Bosne i Hercegovine izrađuju pečatoreznice, na osnovu rješenja Ministarstva pravde Bosne i Hercegovine.

Nadzor nad radom ovlaštenih pečatoreznica u vezi sa izradom pečata, uništavanjem matrice koja služi za izradu pečata, probnim ili neuspješnim primjerkom pečata, provodi Ministarstvo pravde Bosne i Hercegovine.

Ministar pravde Bosne i Hercegovine će, u roku 60 dana od dana stupanja na snagu ovog zakona, donijeti uputstvo o postupku i načinu izrade, načinu vođenja i sadržaju evidencije o pečatima iz stava 3. ovog člana, načinu stavljanja pečata van upotrebe u slučaju istrošenosti, oštećenja, promjene organizacije, odnosno prestanka vršenja javnih ovlaštenja, nestanka ili

gubitka pečata, zamjene nestalog ili izgubljenog pečata, te načinu dostavljanja podataka o izrađenim pečatima institucija Bosne i Hercegovine."

Član 4.

Član 7. mijenja se i glasi:

"Član 7.

Novčanom kaznom u iznosu do 30.000,00 KM kaznit će se za prekršaj pečatoreznica ako:

- neovlašteno izradi pečat bez rješenja Ministarstva pravde Bosne i Hercegovine (član 6. stav 6. ovog Zakona) i
- ne uništi matrice i sve neuspjele primjerke pečata (član 6. stav 7. ovog zakona).

Novčanom kaznom u iznosu do 5.000,00 KM kaznit će se za prekršaj iz stava 1. ovog člana odgovorno lice pečatoreznice.

Novčanom kaznom u iznosu do 5.000,00 KM kaznit će se za prekršaj odgovorno lice u instituciji Bosne i Hercegovine ako:

- ne dostavi Ministarstvu pravde Bosne i Hercegovine otisak pečata i tražene podatke u evidenciju pečata institucija Bosne i Hercegovine (član 6. stav 4. ovog zakona) i
- ne dostavi Ministarstvu pravde Bosne i Hercegovine neupotrebljiv pečat institucije Bosne i Hercegovine na uništavanje pečata (član 6. stav 4. ovog zakona) ".

Član 5.

Ovaj zakon stupa na snagu osmog dana od dana objavljivanja u "Službenom glasniku BiH."

Broj 01,02-02-5-51/10

28. jula 2011. godine

S a r a j e v o

Predsjedavajući
Predstavničkog doma
Parlamentarne skupštine BiH

dr. Denis Bećirović

Predsjedavajući
Doma naroda
Parlamentarne skupštine BiH

Ognjen Tadić